

CBETA電子佛典集成

CBETA Chinese Electronic Tripitaka Collection
ebook

T19n1005A

大寶廣博樓閣善住秘密
陀羅尼經

唐 不空譯

中華電子佛典協會



目次

- [編輯說明](#)
- [章節目次](#)
 - [大寶廣博樓閣善住祕密陀羅尼輪](#)
 - [1_序品](#)
 - [2_根本陀羅尼品](#)
 - [3_心及隨心陀羅尼品](#)
 - [4_成就心陀羅尼法品](#)
 - [5_成就隨心陀羅尼法品](#)
 - [6_諸儀軌陀羅尼品](#)
 - [7_建立曼荼羅品](#)
 - [8_畫像品](#)
 - [9_護摩品](#)
- [卷目次](#)
 - .001.
 - .002
 - .003.
- [贊助資訊](#)

編輯說明

- 本電子書以「CBETA 電子佛典集成 Version 2023.Q1」為資料來源。
- 漢字呈現以 Unicode 3.0 為基礎，不在此範圍的字則採用組字式表達。
- 梵文悉曇字及蘭札字均採用羅馬轉寫字，如無轉寫字則提供字型圖檔。
- CBETA 對底本所做的修訂用字以紅色字元表示。
- 若有發現任何問題，歡迎來函 service@cbeta.org 回報。
- 版權所有，歡迎自由流通，但禁止營利使用。

No. 1005A [Nos. 1006, 1007]

大寶廣博樓閣善住祕密陀羅尼經大寶廣博樓閣善住祕密陀羅
尼輪





曩莫薩嚩怛他孽多南 唵尾補攞孽陞 麼拏鉢囉陞 怛他多 爾捺
捨寧 摩拏 摩拏 蘇鉢囉陞 尾麼黎 娑孽囉 儼鼻隸 吽
吽 入嚩攞 入嚩攞 沒馱 尾盧枳帝 麼呬夜 地瑟恥多 孽
陞 娑縛訶

經云：此陀羅尼有大威德，佛由此成道、由此降魔，能滅惡障、能
成六度。若書紙、素、牌、壁、幢、閣之上，有人暫視、讀誦、受
持，及聞聲、佩身，並轉觸餘人，是人五逆、四重、十惡等罪消
滅，無有刀毒水火、劫賊邪魅，瘡疫寒熱一切病苦，皆悉遠離。見
獲福慶，所求遂意。臨命終時，諸佛安慰，得生淨土。所有禽獸、
飛蛾、蚊虻蟲等，遇影蒙塵，皆得解脫。

大寶廣博樓閣善住祕密陀羅尼經卷上

開府儀同三司特進試鴻臚卿肅國公食邑三千戶賜紫贈司空謚大鑒正
號大廣智大興善寺三藏沙門不空奉 詔譯

序品第一

如是我聞：

一時，薄伽梵住王舍大城，於初會時，降伏俱知魔軍，及調伏一切外道，捨離生死，渡諸瀑流。

是時，那由他百千兢伽羅頻婆羅魔軍，遍瞻部洲。于時世尊以佛神力，變此大地盡成金剛，令瞻部洲有情之類不聞恐怖。時彼魔軍兩諸器仗，皆變為花。於王舍城四衢道中，自然從地涌出大蓮花，其花千葉，七寶莊嚴，黃金為臺、琉璃為莖，高至梵天。出種種光明，普遍十方。於其花中自然出聲，說陀羅尼名為警覺。陀羅尼曰：

「曩莫薩嚩怛他(引)藥帝毘喻(二合) 曳底瑟綻(二合)底娜捨爾勢
唵 麼拏(上)嚩日隸(二合) 紇哩(二合)娜也嚩日隸(二合) 磨羅賽爾
也(二合上) 尾捺囉(二合)跋寧(上) 賀曩 賀曩 嚩日羅(二合)孽陞
怛囉(二合)細也 怛囉(二合)細也 娑嚩(二合)磨(引)囉婆(上)嚩曩(引)
爾 吽 吽 散馱羅 散馱囉 沒馱(引)昧(上)底唎(二合引) 薩嚩
怛他(引)孽多嚩日囉(二合)迦臘 跋(二合)地瑟恥(二合)帝 娑嚩(二合
引)訶(引)」

時，彼蓮花中流出此陀羅尼已，復出妙聲，遍滿三千大千世界，讚言：「善哉！釋迦牟尼如來！已度生死大海、殄滅魔軍，離煩惱塵、破無明殼、然大法炬。由此陀羅尼威德力故，令作大地變成金剛，降伏魔軍。」爾時，金剛手祕密主菩薩，歡喜踊躍，身毛竦豎，頂禮佛足，白佛言：「世尊！今此陀羅尼，於何佛會最初而得？我從昔來，於諸世間，未曾聞見。」

爾時，佛告金剛手祕密主菩薩：「有陀羅尼，名大麼尼廣博樓閣善住祕密，由此陀羅尼威德力故，能令三千大千世界變成金剛，一切魔軍所有器仗咸變為花。由此陀羅尼威神力故，降諸魔眾，及化俱知餘類有情，悉令調伏。由此陀羅尼威神力，於四衢道涌蓮華。」復告金剛手言：「我若不因此陀羅尼，不能成等正覺，不能降伏俱知魔眾，不能枯竭煩惱大海，不能然大法炬。金剛手！我於無量俱知百千劫來，雖難行苦行，猶故不能成菩提果；由纔聞此大陀羅尼加行相應故，得成正覺。金剛手！此陀羅尼，有大威力、有大殊勝，是一切如來真實法性，令諸如來圓證法身。金剛手！由稱此陀羅尼名號，則為已稱十方諸佛如來名號；若能纔念，則為禮拜供養一切如來。」

爾時，金剛手菩薩摩訶薩，以種種花、種種香、塗香、栴香，供養於佛。既供養已，右遶三匝，頂禮佛足，而白佛言：「世尊，此陀羅尼有大威德有大殊勝，唯願世尊普為一切有情說，彼世界現何殊

勝功德？一切有情，不以少善根得聞此陀羅尼。此陀羅尼等同如來身，同舍利法性。」

爾時，世尊告金剛手菩薩言：「金剛手！眾生下劣，不勤精進；心多惑亂，愚癡闇鈍；耽著諸欲，不信正法；不敬父母，不敬沙門、婆羅門，不敬尊者。是故，此陀羅尼不入彼人之手。薄福、少智、少慧，如此眾生不能得聞、不能受持、不生淨信。此陀羅尼能滅一切罪，是諸如來祕密之藏。」

爾時，世尊復告金剛手菩薩言：「善男子，今為汝說。從此世界東方，過無量恒河沙數俱知那庾多佛世界，彼有世界名寶燈，其世界七寶所成。其城四面，廣一由旬。多諸人民，安隱豐樂。彼諸男子，及諸女人、童男、童女，一切瓔珞莊嚴其身，上妙寶冠嚴飾其首，容貌端嚴，有大威力，勇健精進，智慧具足，通達眾藝。城中有王，名曰妙寶，有八十俱知大臣輔佐圍遶。其王皇后名光明寶，有二萬宮人，皆如天女，前後侍奉。彼世界中所生花樹及諸香樹，皆是七寶所成。水生諸花，亦是七寶所成。陸生諸花，皆是閻浮檀金所成。其國人民，壽八萬劫。彼皆成就十善業道，於佛法僧發大淨信。其王以正法養育不以非法，於諸有情常作利益。

「彼世界中有佛，名端嚴摩尼種種清淨建立如來、應、正等覺，於彼世界成佛，廣作佛事，與無量大菩薩摩訶薩眾，及俱知大持明仙眾，以為眷屬。彼如來身紫金色，具三十二相，八十隨形好，圓光一尋。其光周遍，猶如七寶，熾盛照曜。諸菩薩身悉皆金色，晃曜相好，端嚴坐七寶蓮華。彼皆辯才無礙，智境通達明處。皆共思惟大寶摩尼廣博樓閣善住祕密陀羅尼。由此陀羅尼威神力故，出生如是殊勝功德。彼佛世尊為一切有情，演說此陀羅尼法。彼諸有情，由聞此陀羅尼故，常獲安樂。彼一切有情，離諸地獄、傍生及焰魔界，阿脩羅身皆得解脫、諸惡趣門悉皆關閉；開諸天門及開諸善趣，彼世界有情悉皆安住無上菩提，彼一切有情悉住慈心，如水乳合。彼佛世尊往昔久遠行菩薩道時，修此陀羅尼法，作如是願：

『一切有情生我剎土者，彼皆決定不退轉無上正等菩提。』若有眾生聞此陀羅尼，受持、讀誦、精勤修習、憶念不捨，求大成就；乃至聞名，或復手觸、或佩身上、或纔眼視，或書經卷，或書帛素，或書牆壁；一切眾生若有見者，五逆、四重、誹謗正法、誹謗聖人；捕獵、屠兒、魁膾、喃婆、布羯娑；盲者、聾者、瞎者、僂者、人所惡者、瘞者癩者、貧窮下劣；不定業者、魔網縛者、墮邪見者、毘那夜迦觸者、惡星凌逼者、七曜害者，彼等諸人聞此陀羅尼，決定當證無上正覺。乃至傍生，鹿、鳥、蚊、虻、飛蛾、螻蟻，及餘類卵生、胎生、化生、濕生等諸眾生，聞此陀羅尼名者，決定證得阿耨多羅三藐三菩提，不應疑惑。」

爾時，世尊說是語已，一切大眾皆大歡喜，身毛聳豎。是時，天雨波頭摩花、芬陀利花、曼陀羅花、摩訶曼陀羅華。於虛空中，有種種微妙天樂，不鼓自鳴。爾時，會中大眾各各皆見身有光明。於如來前，自然涌出七寶樓閣，端嚴麗好，人所樂見。其寶樓閣，四柱四門及四階道，光明照曜。樓閣四角有四大寶，如日熾盛。復有無量摩尼寶珠綴於羅網，無量寶鐸而懸其上，無量繒幡以為莊嚴，種種妙花間錯垂下。是時，大地六種震動，所謂：動、搖、震、吼、涌、沒之相。諸天宮殿，光明照觸。光所到處，皆悉覺悟。四大天王持明仙等亦復如是。一切魔宮，熾然焰起。一切障者毘那夜迦，皆大驚怖，馳走十方，大聲號哭。

爾時，世尊從眉間毫相放大光明，其光普照，警覺十方一切佛剎中諸佛。既警覺已，其光復收，却入佛頂。時，十方佛咸皆同聲，讚歎釋迦牟尼如來言：「善哉，善哉！釋迦牟尼如來！今可應往寶燈世界，端嚴摩尼種種清淨建立如來所，令此大眾得相隨從，瞻禮供養，又得廣聞大寶廣博樓閣善住祕密陀羅尼法。何以故？此陀羅尼有大威德、有大功能，一切過去諸如來等共所加持。若有人得聞此陀羅尼者，乃至名字，及手觸者，彼人決定得不退轉，證無上正覺。」

爾時，釋迦如來聞彼十方世界中諸如來請已，復放無量俱知百千萬億光明，告諸大會諸人等言：「我今欲往寶燈世界，時將已至，汝等當共速嚴隨從。」

爾時，如來從座而起，詣昇七寶樓閣，以手觸之。其樓閣中忽然而出金剛師子妙座，其座七寶所成，莊嚴殊勝，見者悅意。又於座上生妙蓮華，七寶所成，黃金為莖，紅寶為臺。時，佛世尊於蓮華上敷座而坐。

爾時，世界皆大震動。如來即入大寶清淨三摩地，以三昧力安慰一切大眾，接詣虛空。與一切眾會，并諸眷屬，及大菩薩眷屬，大天、龍、藥叉、彥達嘑、阿蘇囉、誑嚕拏、緊娜囉、摩護囉誑、人及非人，無量俱知持明仙眾、金剛手祕密主，與一切釋梵、護世四大天王等，上昇虛空，往於東方，過無量恒河沙數俱知那庾多百千佛剎，於剎那頃至寶燈世界。從空而下，詣彼端嚴摩尼種種清淨建立如來所，恭敬問訊：「小病？少惱？起居輕利？」時，釋迦牟尼如來，以千葉七寶所成蓮華，奉獻彼佛。時彼如來在大眾會，處天妙宮殿，舒金色臂，安慰釋迦牟尼應正等覺。安慰已，坐於寶樓閣中，謂釋迦牟尼如來曰：「婆伽梵已轉大法輪、降伏魔軍、然大法炬、建立法幢、擊大法鼓、吹大法螺，於彼世界已作佛事，證薩婆若智。婆伽梵今復轉第二法輪，當於閻浮提開正法藏。」纔作是語，彼諸佛剎十八種動，所謂：動、極動、遍動，搖、極搖、遍搖，振、極振、遍振，吼、極吼、遍吼，擊、極擊、遍擊，涌、極

涌、遍涌。爾時，天雨妙華，現大神變。於虛空中，有種種音樂不鼓自鳴，其聲悅意。又諸天子奏諸音樂，所有天龍，雨種種寶、種種香、種種旃檀香水、種種衣服、種種莊嚴具，雨天妙赤珠、馬瑙、毘盧遮那大寶、日藏、月愛、日愛，雨吉祥藏大摩尼寶，雨天妙烏鉢囉蓮華、俱勿頭蓮華、芬陀利蓮華，雨曼陀羅華、大曼陀羅華，雨天妙閻浮檀金華，雨天妙銀花，雨天妙真珠。諸天子於虛空中，出微妙音歡悅讚歎，其音展轉相告：「善哉，善哉！釋迦牟尼如來！今於此時再轉法輪。於閻浮提，建大妙寶如意法幢，所謂大寶廣博樓閣善住祕密陀羅尼大教法王，今於閻浮提，廣大流布。」爾時，端嚴摩尼種種清淨建立如來、應、正等覺，從眉間毫相出光，其光普照十方佛刹，警覺一切如來。其光復照三千大千世界，及諸天宮，一切龍宮，一切地獄、傍生、閻摩羅界、阿蘇羅眾，普皆照曜警覺已，其光復收，右邊彼佛及釋迦牟尼如來三匝，便於頂沒。

爾時，十方世界無量恒河沙數一切諸佛，各各於彼本土作大神變。現神變已，詣彼世界，各各以大神通變化七寶樓閣，於樓閣中出生閻淨檀金師子座。彼一切佛并諸眷屬，於樓閣中坐。爾時，端嚴摩尼種種清淨建立如來，安慰彼等一切如來，以大神通作大供養。彼等諸佛供養已，還坐師子座。

爾時，摩尼藏菩薩摩訶薩，詣端嚴摩尼種種清淨建立如來所，頭面禮足白佛言：「世尊！今現大集會。諸佛菩薩，并天、龍、藥叉、彥達嘑、阿蘇囉、孽嚕拏、摩護囉誡、人非人等，并大持明仙會，所謂金剛手菩薩為上首，與大摩訶薩現大神變。唯願宣說大寶廣博樓閣善住祕密陀羅尼，今正是時。」乃至第二、第三作如是請。

爾時，端嚴摩尼種種清淨建立如來告摩尼藏菩薩摩訶薩言：「汝往釋迦牟尼如來所，啟請彼佛，當為汝說。」

時，摩尼藏菩薩，詣釋迦牟尼應正等覺所，遶佛三匝，合掌頂禮，前住白佛言：「世尊！我今請世尊說大寶廣博樓閣善住祕密陀羅尼，為哀愍利益一切有情故。」

爾時，釋迦牟尼如來受摩尼藏菩薩請已，即告金剛手祕密主菩薩言：「祕密主！汝往於大眾，以金剛杵扣擊於地。」時，金剛手祕密主，承佛聖旨，於大眾道場中，以杵擊地。纔擊地已，其地四裂。時，三千大千世界六種震動，於彼裂處涌出七寶樓閣。其樓閣四角四柱四門，嚴麗殊特，相好圓備，光明赫奕，有四階道。高三由旬，縱廣正等有五由旬。於樓閣中現閻浮檀金窠觀波，種種寶珠而為嚴飾，七寶羅網而覆其上，無量寶鐸懸於四角，妙花繒綵而為間錯。彼窠觀波中有三如來身。爾時，一切如來并諸菩薩大眾，皆共供養寶樓閣窠觀波中三如來，所謂：花鬘、燒香、塗香、栴香、幢、幡、寶蓋，奏諸音樂，合掌禮敬。時，諸天、龍、藥叉、彥達

嚩、藥嚩拏、緊那囉、摩護囉識、人非人等，一切眾會咸悉瞻仰，皆生奇特希有之心，咸作是言：「此寶樓閣窺覩波從何而來？」高聲讚言：「奇哉希有！」旋遶、歌詠，花香、塗香、栴香，并諸音樂，供養寶樓閣窺覩波，合掌頂禮，瞻仰而住。

爾時，於樓閣中出聲告言：「汝諸大眾，可觀空中。」眾聞此聲已，咸觀空中，即見廣大吠瑠璃寶所成雲葉在於虛空。其寶雲葉上，以金書此大寶廣博樓閣善住祕密陀羅尼。於虛空際復出聲曰：「汝等一切諸佛并菩薩大眾，咸可讀此寶雲葉上陀羅尼。」出此聲已，於十方所來諸佛一一佛前，皆現吠瑠璃寶所成雲葉，葉上以金書此陀羅尼。復出是聲：「南謨釋迦牟尼如來！今可開此寶樓閣窺覩波門，於彼窺覩波中有三如來身，由此三如來威神力故，現大神變殊勝之相。彼三如來於此會中，當具說此大寶廣博樓閣善住祕密陀羅尼，并曼荼羅成就明法。」

爾時，十方同來諸佛咸作是言：「唯願釋迦牟尼如來、應、正等覺，為諸大眾開此窺覩波門，令諸大會見三如來，所謂摩尼寶花幢王如來，種種摩尼如來，金剛超涌王如來、應、正等覺。」

爾時，釋迦牟尼如來現大神通，往詣寶樓閣窺覩波，舒百福莊嚴金色臂，開窺覩波門已，示三如來身。時，三如來讚釋迦牟尼言：

「善哉，善哉！釋迦牟尼如來！今於瞻部洲再轉法輪。薄伽梵！可於此坐。」

爾時，釋迦如來即昇寶塔，與三如來同座而坐。

爾時，金剛手菩薩摩訶薩，頂禮釋迦牟尼如來，白佛言：「世尊！今此樓閣，及窺覩波中三如來，從何而來？」佛言：「乃往古昔不可思議無量無比過無數劫，於此閻浮提，多諸人眾安隱豐樂，香稻不種自然成熟，人無彼我亦無貯積。當彼之時，無佛出世。有一寶山王，彼山王中有三仙居住，一名寶髻、二名金髻、三名金剛髻。彼三仙人決定思惟佛法僧寶，復作是念：『我等何時成佛，證無上等正覺，度諸有情？』時，彼仙等作是思惟已，須臾默然。復起前念故，即證於諸有情慈心歡喜種種樓閣三摩地，即獲天眼，觀於上方，見淨居天。復於空中有聲言：『善哉，善哉！正士能發勝心！所謂阿耨多羅三藐三菩提心。汝豈曾聞大寶廣博樓閣善住祕密陀羅尼耶？過去一切如來為諸有情利益故，已曾演說。纔聞此陀羅尼者，當於無上菩提得不退轉，一切佛法當得現前，證得一切三摩地，一切陀羅尼法悉皆現前；善能降伏一切魔軍，然大法炬；一切善根當得現前，滿足六波羅蜜；能解一切地獄、餓鬼、傍生、焰魔界、阿蘇囉眾，及生、老、病、死、憂悲苦惱，永得解脫。當於後世時，於此瞻部洲有情不孝父母，不敬沙門、婆羅門，不敬耆舊，誹謗正法，毀謗聖人，應墮地獄。誹謗諸佛菩薩，殺阿羅漢，作五無間罪；殺婆羅門，及殺牛者；抄劫、竊盜、妄語者，不與取者，

慾邪行者，離間和合者，雜染語者，輕秤小斛者，強奪財物者，匿他財物者；妄言背信者，先世惡業所持者，彼一切有情類，由此陀羅尼威力，若讀、若誦、受持，若佩身上，若書衣中，若置幢上，若書經卷，若書素氎及牆壁牌板，乃至聞聲、手觸及影其身，及轉觸餘人，決定當得不退轉無上菩提，能於現世獲無量百千功德，遠離諸罪，成就一切善根，摧伏諸魔。於諸世間皆得敬愛，於一切處皆得供養，一切國王、王子、宰官、後宮，并諸眷屬，皆得歡喜，一切沙門、婆羅門亦皆歡喜。言音威肅，人所樂聞，手脚柔軟，聲相和雅。離於貧窮，不受世間毒藥、刀杖、水火等難。諸惡獸怖，不能為害。無諸賊怖，無劫盜怖，無旃陀羅怖，無喃摩怖，行大小路悉皆無怖。無鬼神怖，無羅刹比舍遮怖，無拏吉爾怖，無毒蛇怖。乃至一日、二日、三日、四日寒瘧常瘧，一切瘧病悉不著身。眼病、耳病、鼻病、舌病、齒病、唇病、喉病、項病、諸支分病、手病、背病、腰痛、臍病、痔病、淋病、痢病、癰瘡病、脾病、脛脚痛病、丁瘡腫病、癰癰斑病、肚痛疥病、疱跛癰癰，無如是等病。無頭痛，不盲、不瞎、不傴，無橫災死，不聾、不瘡、不被輕欺。如是等類，現世不受。得無礙辯，臨命終時心不散動，一切諸佛現前安慰。亦不為[示*厭]禱、蠱毒、呪詛著身，臥安、覺安。於其夢中見百千佛刹，及見諸佛并諸菩薩圍遶。由此祕密陀羅尼威力故，獲如是殊勝功德。』

「時，彼仙人得法歡喜，心生踊躍，於其住處便捨身命。所捨之身由如生酥，消融入地。即於沒處，而生三竹。金為莖葉，七寶為根，於枝梢上皆有真珠，香氣芬馥，常有光明，所有見者無不欣悅。其竹生長十月，便自剖裂，各於竹內生一童子，顏貌端正，令人樂見。最勝端嚴，光色殊麗，相好成就。時，三童子即於是地竹下，結跏趺坐即入正定，至第七日，於其中夜，皆成正覺。其身金色，三十二相，八十種好，圓光嚴飾。時，彼三竹悉皆變成七寶樓閣。又於虛空中，有大寶廣博樓閣善住祕密陀羅尼，以金為字，忽然而現。時，有四大天王，所謂：寶髻龍主天王、寶藏鳩槃荼主天王、殊妙光摩護囉識主天王、摩尼金剛藥叉主天王，各持寶蓋而覆其上，唱佛功德。是四天王，各有無量百千眷屬，悉持妙花而以供養，咸作是言：『今佛世尊出現於世。』」

爾時，世尊告金剛手菩薩摩訶薩言：「昔三仙人，豈異人乎？今此寶樓閣窺觀波中三如來是，彼時三竹者今妙樓閣是，彼時地者今此地是，彼時世界者今此世界是。彼三仙人，由聞此陀羅尼勤修習故，捨彼仙身成等正覺。復次，金剛手！彼時空中，讚歎此陀羅尼淨居天子者，豈異人乎？則我身是。是復有侍者，名曰淨居，常勤承事彼三仙人。其三仙人成正覺已，亦復供養。為彼淨居而授記

曰：『汝於來世當得作佛。』其淨居者豈異人乎？今此端嚴摩尼種種清淨建立如來是。」

爾時，十方世界所來一切諸佛，咸讚釋迦牟尼如來言：「善哉！善哉！能以如來神通加持，說此往昔因緣，示現如來祕密陀羅尼。此陀羅尼，是一切如來祕密，是一切如來母，是一切如來心祕密陀羅尼，是一切如來轉法輪祕密陀羅尼，是一切如來往詣菩提道場祕密陀羅尼，是一切如來詣金剛師子座祕密陀羅尼，是一切如來神通遊戲祕密陀羅尼，是一切如來波羅蜜圓滿祕密陀羅尼，是一切如來般若波羅蜜攝授祕密陀羅尼，是一切如來真言祕密陀羅尼，是一切如來曼荼羅祕密陀羅尼，是一切如來堅持印祕密陀羅尼，是一切如來放俱知光祕密陀羅尼，是一切如來實際祕密陀羅尼，是一切如來三摩地神變加持祕密陀羅尼，是一切菩薩菩提心莊嚴祕密陀羅尼，是一切菩薩安立如來地祕密陀羅尼，是一切三摩地通達祕密陀羅尼，是摧一切障祕密陀羅尼。汝今說耶？」

爾時，釋迦牟尼如來、應、正等覺，住正念智，觀察一切如來，出大梵音，復放百千萬俱知那庾多種種光明，所謂：青、黃、赤、白、紫，普遍十方諸佛世界照曜已，警覺一切如來，其光復收遶佛三匝，沒於佛頂光既沒已。

爾時，世尊以淨妙梵音，於大眾中即說警覺陀羅尼曰：

「唵 薩嚩怛他繫多 摩拏 捨多儺跋底(二合平) 入嚩(二合)攞 入嚩(二合)羅 達麼馱覩藥鞞 麼拏 麼拏 摩訶麼拏 怛他藥多 訖哩(二合)怛野 麼拏 娑嚩(二合引)阿(引)」

說此警覺大明陀羅尼已，山林大地六種震動，一切如來同聲讚言：

「善哉，善哉！釋迦牟尼如來！善說此最勝祕密陀羅尼。」於虛空中現瞻部金雲，遍滿十方。於其雲中下七寶雨，復雨龍堅旃檀末，復雨優曇鉢花，而以供養；及餘種種妙花，復雨蓮華、俱物頭花、芬陀利華、蘇嚩地迦華、曼陀羅華、摩訶曼陀羅華、嚩遮華、摩訶盧遮華、曼殊沙華、摩訶曼殊沙華、蘇摩那華、末利師華、瞻蔔華，而供養佛。一切魔宮，熾然火起，一切魔眾，愁憂萎悴，皆大驚怖。一切障者毘那夜迦驚懼，身皆流汗，惡氣臭穢，十方馳走。所有諸天，於佛教中生淨信者，及天、龍、藥叉、彥達嚩、阿蘇羅、藥嚩拏、緊那羅、摩護羅識、人非人等，各持供具，虔誠供養如來。復有摩尼照曜思惟菩薩而為上首，與無量俱知那庾多百千菩薩，悉持種種妙寶而供養佛。時，金剛手菩薩而為上首，與無量百千持明仙，各持種種百千天衣，而供養佛。復有四大天王，與無量百千萬億四天王眾，以種種香華、塗香、鉢香、花鬘、衣服、幡蓋而供養佛。復有梵天，與梵眾諸天而來供養。復有三十三天與百千萬億天子，帝釋而為上首，供養於佛。如是那羅延大自在天，寶賢、滿賢、賢力天等，同來供養。復有日月天子，在於空中而供養

佛。復有大吉祥天女、大辯才天女、餉企尼天女、訶利底藥叉女，與無量百千藥叉而為眷屬。復有毘摩大天女、金剛迦離天女、華齒天女、使者大天女，百千萬億，各各以天宮殿供養於佛。復有無量彥達嚩眾，奏百千種天妙音樂而供養佛。復有無量百千龍王集會，所謂：娑竭羅龍王、難陀龍王、鴈波難陀龍王、嚩魯拏龍王、善住龍王、寶髻龍王、普遍形圓滿龍王，以種種光味寶而供養佛。復有轉輪王，與無量百千萬億大臣、宮人、嫖女及千子圍遶，來供養佛。爾時，大地變成金剛，於如來前從地涌出七寶蓮華，其華百葉。於其華中，有瞻部金剛千幅寶輪，光明赫奕如日，其光遍照三千大千世界。於寶輪中出微妙聲，作如是言：「善哉，善哉！釋迦牟尼如來！能說如是祕密陀羅尼，能轉無上大法輪，能詣大菩提場。此陀羅尼是諸如來祕密明心，是諸如來真實理趣明心。唯願世尊復更為說此大寶廣博樓閣陀羅尼。世尊已說警覺心陀羅尼，由此陀羅尼，警覺一切如來并其大眾，皆來集會。世尊！說此祕密陀羅尼，今正是時。世尊！此陀羅尼是成佛根本，能除一切罪、能竭一切苦海、能遮止一切生死曠野、能越一切煩惱瀑流，若無此陀羅尼大明王，終不能成無上正覺。此陀羅尼是成佛種子、是轉大法輪、是燃大法炬、是建大法幢、是吹大法螺、是繫大法鼓、是法師子座。善哉！世尊！唯願廣為大眾說此大陀羅尼王、曼荼羅、印法、畫像法。」爾時，大會雲集天、龍、藥叉、彥達嚩、藥嚩拏、緊那囉、摩護囉、人、非人等，咸生希有奇特之心，皆禮世尊瞻仰而住。爾時，世尊聞大眾虔誠請已，即為廣說此陀羅尼大教王法。

根本陀羅尼品第二

爾時，世尊告諸大眾：「我今說此陀羅尼教王。此陀羅尼能成就無上菩提，若有受持，能除一切罪業，身得清淨。」即說根本陀羅尼曰：

「曩莫薩嚩怛他(引)藥多(去)南(一)(引) 唵(二) 尾捕攞藥陸(三) 麼拏鉢囉(二合)陸(四) 怛他多(五) 爾捺捨寧(六) 麼拏麼拏(七) 蘇(上)鉢囉(二合)陸(八) 尾麼黎(九) 娑(引)藥囉(十) 儼鼻嚩(十一) 吽(十二) 吽(十三) 入嚩(二合)攞 入嚩(二合)攞(十四) 沒馱尾盧枳帝(十五) 闍呬夜(二合) 地瑟恥(二合)多(上) 藥陸(十六) 娑嚩(二合引)訶(引)(十七)」

爾時，世尊說此大寶廣博樓閣善住祕密根本陀羅尼已，於此大地六種震動，雨大寶雨及大妙華。一切所來大眾咸皆歡喜，歎未曾有，能令一切善法皆悉成就，證得十地。是時，十方諸如來同聲讚歎釋迦牟尼如來言：「善哉！釋迦牟尼如來！乃能說此入菩提道場陀羅尼。若纔聞此陀羅尼，除滅一切惡趣。纔憶念此陀羅尼者，則為以

諸微妙香華、塗香、栴香供養十方一切諸佛。若能纔誦，即得不退轉無上正覺。乃至百劫千劫百千劫，一切如來不能讚歎盡其功能。此陀羅尼有大威力，一切諸魔，終不能作其障礙，一切冤家、惡友、鬼神、藥叉、羅刹、人非人等，不得其便，增長無量善根。若纔念此陀羅尼者，獲福無量。何況久能誦持，其福不可校量。」

爾時，執金剛手藥叉將，及四大天王，往詣佛所，恭敬合掌，頂禮佛足，供養而住，白佛言：「世尊！我等擁護持此陀羅尼有情，加持養育，皆令歡喜。」

爾時，世尊舒金色手，摩執金剛菩薩頂，及安慰四大天王，作如是言：「我以此陀羅尼付囑於汝，若有持此陀羅尼者，汝當擁護。」

爾時，執金剛手菩薩及四大天王白佛言：「世尊！我等受付囑已，以此大教王，常當擁護彼有情受持陀羅尼者。」

心及隨心陀羅尼品第三

爾時，世尊復說心陀羅尼曰：

「唵(一) 麼拏嚩日禮(二合)(二) 吽」

爾時，世尊復說隨心陀羅尼曰：

「唵(一) 麼拏(尼軫反)馱(上)禮(二) 吽 泮吒(半音)」

「若誦持根本陀羅尼者，不假揀擇時、日、宿曜，不限齋戒，但誦滿一萬遍已，然後佛前或舍利塔前，於白月十五日，潔淨洗浴，著鮮淨衣，隨力供養，燃四盞燈，散諸香華。受持陀羅尼者，食三白食，旋遶制底一百八匝，誦陀羅尼一百八遍，便於當處寢息。天欲曉時，如來即現其身，執金剛手菩薩亦現於前，所有願者皆得如意。若造五無間罪者，作如是法第三遍，方得感現，勿生疑惑。常於清旦誦一百八遍，所求之事皆得成就，蠱毒諸毒不能為害，水不能漂，火不能燒，賊不能劫，病不能侵。無他冤怖，常無重病，亦無眼病、耳病、鼻病、舌病口病、齒病、脣病、頭痛、肢節痛、一日瘡、二日三日四日瘡，悉不著身。諸惡毒蛇、虎狼、禽獸，不能為害。[示*厭]禱、呪詛，亦不著身。此陀羅尼威力如是，能息一切怖畏、能滅一切惡障、能生一切功德、能成就六波羅蜜、能成就如來境界。纔誦此陀羅尼者，皆能成辦一切事業。若有人登大高山頂誦此陀羅尼，盡眼所見處，所有眾生滅一切罪業，亦離一切地獄業，得免一切傍生身。若入天廟中誦此陀羅尼者，使諸天神皆悉奉教；若入龍池中誦此陀羅尼者，一切龍眾皆來歸命；若於日前誦此陀羅尼者，日天子即來現其人前，所求意願皆能與之。若有人於執金剛手菩薩前誦此陀羅尼者，金剛手菩薩現於其前，所求願者亦得隨意。若有人取菖蒲根誦此陀羅尼一千八遍，口中含之，入於王宮，所有演說，妃后、嫔女歡喜淨信。若加持胡椒含於口中，共他

人語，所出言辭皆悉信受，當生歡喜。若加持白芥子一千八遍，擲於虛空，一切惡風雷雹皆得消散。若加持鹽一百八遍，與淨行婆羅門，皆來敬愛，食此鹽者皆得歡喜。若欲令剎利敬愛者，取白芥子護摩一千八遍，即得敬愛。若加持安悉香一千八遍，於一切鬼魅病人前燒，隨其所願，皆自下語，彼病即差。若亢旱時，先以瞿摩夷塗地，作四肘方壇，中心畫一水池方二肘，作青色。於池中取瞿摩夷和土為泥，捏作一龍。腰已上為菩薩身，作菩薩面，於其頭上出三蛇頭。腰已下為蛇身，於池中盤屈。其龍遍身以黃丹塗，令作赤色，以金薄貼龍心上。遶壇四邊，以白粉畫作蓮花。於壇四角插四隻箭，以五色線纏繞於箭，周圍其壇。又於線上懸五色小幡，四角安四水瓶，四門安香爐，又用四箇小瓶：一瓶盛乳、一瓶盛酪、一瓶盛乳麋、一瓶盛酥及沙糖。然四盞燈，燒四種香，所謂：安悉、董陸、白檀、蘇合，於壇上散七種穀子(大麥、小麥、稻穀、菰豆、油麻、芥子、白芥子)，供養五色食飲并諸花菓。念誦人面向東坐，取白芥子先誦陀羅尼，加持一千八遍已，然後取白芥子一顆，誦陀羅尼一遍，釘龍頭上，滿一千八遍，其龍即降雨，一切龍皆降伏。若欲止雨，加持白芥子一百八遍，擲龍池中，其雨即止。若有惡風雹雨，取佉陀羅木作橛，釘龍池邊，即得霜雹不下，惡風即止。若欲縛毘那夜迦，取白芥子加持一百八遍，安毘那夜迦頭上，便不能作其障礙。以乳洗毘那夜迦，即得解脫。所作事業皆得成就。其持誦者，常須清潔，著鮮淨衣。此是根本陀羅尼法。」

大寶廣博樓閣善住祕密陀羅尼經卷上

namaḥsarvatathā gatanā mṃvipulagarbhemaṇiprabhetathā gatanidarśanemaṇimaṇisuprabhevimaḥ ā garagambhī rehū mḥ ū mḥ v ā lajv ā labuddhā vilokiteguhyā dhiṣṭita garbhesv ā h ā

開府儀同三司特進試鴻臚卿肅國公食邑三千戶賜紫贈司空謚大鑒正
號大廣智大興善寺三藏沙門不空奉 詔譯

成就心陀羅尼法品第四

「凡成就心陀羅尼事業者，誦十萬遍，即見一切如來。誦二十萬遍，得見一切佛土。若誦三十萬遍，得成入一切曼荼羅，一切真言法悉得成就。誦四十萬遍，得持明仙中轉輪王。誦五十萬遍，一切阿蘇囉及諸仙窟龍宮窟門自開，悉皆得入。若誦六十萬遍，得見一切伏藏。若誦七十萬遍，即憶知過去無量生宿命事。若誦八十萬遍，即得寶印三摩地。若誦九十萬遍，得一切菩薩遊戲神通加持。若誦一百萬遍，得一切如來灌頂，與一切如來同會。福慧如是倍增，而獲無量殊勝功德。若造五無間罪，誹謗聖人、誹謗正法，應入阿鼻地獄者，由誦此陀羅尼十萬遍，一切業障悉皆消滅，得不退轉，獲宿命智，一切如來護念攝受，得眼清淨、耳清淨、鼻清淨、舌清淨、身清淨，增勝無量殊勝功德，轉受增勝，身業清淨，兼獲世間種種事業隨意成就。

「復次說雄黃法。取好雄黃置熟銅器中，從白月十三日，清淨洗浴，著鮮淨衣，喫三白食，所謂：乳、酪、粳米，於佛前加持十萬遍，至十五日夜，所加持雄黃現三種成就相：若煖、若烟、若光焰，即得成就。若煖，將用點額，即得安怛那成就，入阿蘇羅窟及一切神仙龍宮，得持明轉輪王位，意樂所作皆得成就。若煙出，用點眼中，當見一切菩薩宮殿住處，又見一切金剛族類菩薩，一切諸惡魔不能障礙，獲得一切法藏，隨所去處皆得通達。若現光焰，即騰虛空，證得燃炬陀羅尼三摩地，得作三十三天中主宰，所須皆得。若於山頂上誦一萬遍，得一切眾生尊重，所求皆得，一切瞻部人咸來恭敬。若入水池中誦一千八遍，一切諸龍皆悉降伏。取白芥子加持一千八遍，散擲虛空，應時注雨，降伏諸龍。若常日日誦持，獲大吉祥。若患一切病，取水一瓶，以因陀羅呵悉多藥(白及藥也)、及鉢羅奢藥(赤及也)、白芥子，并鬱金香、白檀香等各一分，內著瓶中加持一萬遍，取此香水淋灌於頂，一切大重病人皆得除差，及滅一切罪障。所有符書壓禱，皆悉消滅，獲得一切殊勝吉祥。若患癩病，澡浴灌頂亦得除差。若患白癩風，以水灌頂亦得除差。若有女人意欲求男，以水灌頂即便生男。若有人久持誦無靈驗，悉地不見前者，作此灌頂法速得悉地。如是等世間、出世間，所求一切願皆得成就」

成就隨心陀羅尼法品第五

「誦隨心陀羅尼滿一萬遍，所有諸鬼神作障難者，悉來接足禮拜，白言：『持明者救護我等，勿斷我命！所使我者，決定得了，我皆成就。』若誦二萬一千遍者，即得一切天龍敬伏，為天中主，所出言辭，天皆奉行。若誦三萬遍，一切鬼神藥叉等，咸悉順伏。若誦四萬遍，意欲鉤召，隨意即成。若誦五萬遍，所欲鉤召追攝，若天、若龍、若藥叉、若藥嚕拏、若緊那羅、阿蘇囉、摩護囉，及仙人、婁女、沙門、婆羅門、刹利、國王、王后、宰相、群臣，及餘種種人等，皆得隨意。燒安悉香和白芥子，若誦六萬遍，得無垢三摩地。若誦七萬遍，得作持明仙中轉輪王。若誦八萬遍，執金剛手菩薩及與眷屬來現其前。若誦九萬遍，得諸菩薩施與無畏。若誦十萬遍，得見一切如來。彼等如來作是言：『善男子！汝欲所往諸佛刹土，皆得隨意無有障礙。』通達一切真言，通達經論，一切如來加持，於三藐三菩提不退轉。及得種種世間、出世間法，心所樂求，皆得成就，諸佛如來皆悉印可。」

諸儀軌陀羅尼品第六

「坐真言曰：

「『唵 摩拏 軍吒利 吽 吽 娑嚩(二合引)訶』

「誦七遍然後坐，作餘護持法。

「次結壇界真言曰：

「『唵 摩拏 尾惹曳 馱囉 馱囉 吽 娑嚩(二合)訶』

「誦此真言加持白芥子七遍，散於四向便成結界。

「次結十方界真言曰：

「『唵 入嚩(二合)里多 麼拏嚩止囉 室里(二合)拏 吽 吽 泮吒(半音)』

「誦此真言加持香水，和白芥子一百八遍，散於十方，即成結十方界。

「辟毘那夜迦真言曰：

「『唵 摩拏 鉢囉(二合)娑嚩底 賀囉 賀囉 吽吽 泮吒(半音) 娑嚩(二合)訶』

「誦此真言，加持灰水二十一遍，散於十方。

「頂髻真言曰：

「『唵 嚩日囉(二合) 摩拏 底瑟吒(二合) 底瑟吒(二合) 吽 吽 泮吒(半音)』

「誦此真言七遍加持，右手作拳舒大指，以摩頂右旋三匝，即成護身。

「加持衣真言曰：

「『唵 摩拏微布黎 地里 地里 吽 泮吒(半音)』

「誦此真言七遍加持衣服。

「洗漱真言曰：

「『唵 尾爾庾(二合)嚩底 訶囉 訶囉 摩訶摩拏 吽 吽 泮吒(半音)』

「誦此真言加持水洗手漱口，及用灑於身，能淨諸根。

「洗浴真言曰：

「『唵 蘇涅摩囉嚩 底 訶囉 訶囉 播奔 弭哩 弭哩 吽娑嚩(二合)訶』

「誦此真言，加持白芥子水一百八遍浴身法。

「護真言曰：

「『唵 摩拏達哩 吽 吽 泮吒(半音)』

「誦此真言，用灑一切香花菓實飲食及所用之物，皆用此真言加持而護之。

「神線真言曰：

「『唵 地哩 地哩 微麼羅迦哩 吽 吽 泮吒(半音)』

「獻真言曰：

「『唵 薩嚩怛他孽多 布惹麼拏 吽 吽』

「所有花皆誦此真言加持，散時亦誦。

「塗香真言曰：

「『唵 薩嚩怛他孽多 嚩駄摩拏娑頗(二合)囉拏 吽』

「燒香真言曰：

「『唵 入嚩(二合)里多 麼拏阿沒囉矩吒娑頗(二合)囉拏(上)尾孽底 吽』

「燈真言曰：

「『唵 入嚩(二合)里多 始佉嚩駄嚩哩 吽 吽 泮吒(半音)』

「獻食真言曰：

「『唵 鉢囉(二合)嚩囉(引) 孽囉(二合)嚩底 娑囉 娑囉 吽吽』

「獻闍伽真言曰：

「『唵 摩訶末拏布囉耶 駄囉 駄囉 吽 吽』

「奉獻供養物及食等真言曰：

「『唵 摩訶微麼犁 吽 吽 娑囉 娑囉 吽』

「護摩真言曰：

「『唵 入嚩(二合)羅薩普(二合)囉 誒誒那鉢囉(二合)多羅拏 吽 吽』

「加持念珠真言曰：

「『唵 嚩止囉 摩拏鉢囉(二合)鞞多耶 吽』

「以此真言加持念珠七遍，若念誦本真言一遍移一珠，即成誦一切如來所說真言一遍，一一真言成無量百千那庾多遍。

「念誦時真言曰(欲念誦本真言時先誦此真言)：

「『唵 嚩日囉(二合) 摩爾迦囉緊迦哩 吽 吽 泮吒(半音)』

「結跏坐真言曰：

「『唵 蘇鉢囉(二合)鞞底多吠藝 摩拏 摩拏 娑嚩(二合)訶』

「警覺一切如來真言曰：

「『唵 薩嚩怛他鞞多嚩庾(平)惹吠 多羅 多囉 吽 摩拏迦娜寧 娑嚩(二合)訶』

「請一切如來真言曰：

「『唵 微布羅鉢囉(二合)嚩黎 杜嚕 杜嚕 吽吽』

「求願真言曰：

「『唵 薩嚩怛他鞞多 地瑟吒(二合)那質多僧 [口*洛]訖叉(二合)拏 嚩日禮(二合) 吽 吽』

「求菩薩願真言曰：

「『唵 蘇尾布羅嚩娜寧 訶囉 訶囉 吽』

「請一切天龍真言曰：

「『唵 阿鼻娑摩耶 嚩日禮(二合) 馱囉 馱囉 吽』

「請四天王等真言曰：

「『唵 摩拏尾誒嚩底 吽』

「加持弟子真言曰：

「『唵 輸(上)婆摩拏 戶盧 戶盧 吽』

「加持弟子，令弟子入壇真言曰：

「『唵 薩嚩怛他鞞多 曷哩(二合)捺耶 嚩日哩(二合)拏 達囉達囉 吽 吽』

「獻一切佛、一切菩薩、諸天等食真言曰：

「『唵 尾囉 尾囉逝誒誒那嚩呬爾 攞呼 攞呼 吽 吽』

「所有一切香花飲食，皆誦此真言用持獻之。

「護身真言曰：

「『唵 摩拏蘇唵(二合)婆拏吠誒嚩底 囉訖叉(二合) 囉訖叉(二合)[牟*含] 吽』

「奉送諸聖眾真言曰：

「『唵 薩嚩怛他鞞多 矩盧爾底娑摩囉尾誒底 入嚩(二合)羅入嚩(二合)羅 吽 吽娑嚩(二合)訶』

「誦此真言通一切處用，所謂奉送本尊、獻闍伽、香花、飲食等用。

「已上一切心真言，先各誦一百八遍，然後作法。時纔誦，滅一切罪，一切苦惱皆得解脫，諸佛如來決定授菩提記，當得作佛。先世惡業，受持此真言悉皆消散，獲無量恒河沙數功德，速證無上正等菩提，能轉法輪。」

建立曼荼羅品第七

爾時，世尊說曼荼羅儀軌：

「依時依法，先擇勝地，然後作壇。其壇四肘四門，以瞿摩夷和土，遍塗拭之。壇上張一白蓋，稱壇大小。於壇中心取二肘，并作一小方壇，先以白檀香塗拭，次用鬱金香塗之，或以五色粉搥成，或畫亦得。於新器中，和彩色用之。於小壇中畫七寶樓閣，於樓閣中畫一佛形像，作說法相。佛前作一蓮華，七寶莊嚴。於蓮華胎中畫作一輪，其輪百輻，齊輞具足，以金莊嚴，輪外畫焰光。其蓮華莖，吠琉璃色。佛左邊畫金剛手菩薩而作忿怒形，右手執金剛杵，左手執白拂。右邊畫摩尼金剛菩薩，種種瓔珞莊嚴其身，左手執持寶珠，右手執白拂。四角各畫四天大王，身著甲冑手執器仗，種種頭冠瓔珞，莊嚴其身，作瞋怒形。其小壇中畫七寶界道，於其壇上懸一傘蓋，可一肘量，於傘蓋四面周匝懸幡。其大壇東門懸五色繒幡。以四金瓶滿盛香水，於瓶中著七寶及諸香藥五穀，於瓶口插時花有菓枝條，以繒帛繫瓶項，置壇四角。又以四銀瓶滿盛乳，安大壇四隅。若無金銀瓶，以金銀圖瓶替之。於中壇南門中，畫大吉祥天女，種種瓔珞莊嚴其身。北門中畫餉棄尼天女，壇西門中畫金剛使者天女，八臂持種種器仗，以種種瓔珞莊嚴，上懸青繒幡。於中壇四邊，香花飲食隨力供養，然三十二燈，種種花菓散其壇上。於佛像前置金香爐，燒蘇合香；金剛手菩薩前以銀香爐燒安悉香；摩尼金剛菩薩前亦以銀香爐燒酥合香；於四天王前燒薰陸酥，合白膠香和燒。於吉祥天女前燒白壇香，於餉棄尼天女前燒安悉香，於金剛女使者前燒薩羅計香(是青膠香)；於四天王等前，各各別以飲食而供養之。其中壇四門外，各立吉祥標門。其大壇東門中畫訶利帝母，七子圍遶；於南門中畫大自在天王；於西門中畫花齒羅刹女；於北門中畫毘摩天女，顏貌美麗有七嫫女圍遶。於壇上四邊插三十二隻箭，其一一箭，以五色加持線纏，周匝圍遶，於線上懸五色小幡以為莊嚴。於大壇外食界道上，安置種種花、種種味飲食、種種菓、七種油餅、三十二椀、三十二瓶、三十二香爐，燒燈一百八盞，種種末香、種種燒香，所謂：薰陸香、安悉香、必栗迦(苜蓿

香)、白檀、沈香、多摩羅香、蘇合薩羅計(青膠是也)，應燒五石蜜香，又以龍腦香、麝香、鬱金、紫檀、白檀等，各各以為塗香。次應獻食飲：乳、酪、沙糖水、石蜜水，各盛八瓶，乳粥八椀。又以粳米、菉豆、油麻相和，作粥八椀，粳米飯、歡喜團各八椀，又粳米粥八椀。復盛油四瓦椀，酥四瓦椀，沙糖四椀，石蜜四椀，油麻四椀，菓子四椀，七種穀子四椀。應以種種飲食供養，所謂：天竺餅、煎餅、菉豆餅、油麻煎餅、無憂餅、妙味餅、酥餅、沙糖餅，已上飲食隨所得營辦。當於引弟子入壇門中，兩邊置香水二瓶，應為弟子作入壇儀軌。其弟子入已，即為弟子灌頂，誦此真言以用灌頂真言曰：

「『唵(一) 摩訶尾布羅(二) 鉢囉(二合)底(丁以反)瑟恥(二合)多悉第(三) 阿毘訖者[牟*含](四) 薩嚩怛他摩多鼻囉闍(五) 婆囉婆囉(六) 三婆囉(七) 吽 吽』

「纔灌頂已，先世一切罪障、一切業障，悉皆清淨，得一切如來攝受、一切如來加持、一切如來灌頂、一切如來安慰、一切悉地現前，所思所求皆得滿願，即成入一切如來三昧耶曼荼羅，入一切如來法性，證甚深法忍，往詣菩提場獲得如是等勝上功德，乃至獲得不退轉，證無上正等菩提。」

畫像品第八

爾時，世尊告諸大眾：「我今說畫像法，而能成就一切事業。應取新白氎不割截者，或一肘，或二肘，令四方等。畫人應受八戒。其畫彩色，於新器中盛，勿用皮膠。畫七寶莊嚴樓閣，於樓閣中畫如來，作說法相，坐師子座。佛右邊畫金剛手菩薩，十二臂黃白色。其像四面：正面歡喜；右邊面忿怒相；左邊面開口，狗牙上出；當頭上面，顰眉怒目。頭冠瓔珞種種莊嚴，於蓮華上半跏而坐。左邊畫寶金剛菩薩，四面十六臂。正面歡喜；右面青色，作摩訶迦羅天面；左面綠色，作師子面。頭上面顰眉露齒忿怒，作淺綠色。右邊第一手持真多摩尼寶，作獻佛勢，左邊第一手持蓮花；右第二手作安慰手，左第二手持三戟叉；二手合掌，餘手皆執諸器仗：右第四手持輪，左第四手持劍；右第五手持金剛杵，左第五手持花籃；右第六手持念珠，左第六手持軍遲；右第七手持刀，左第七手持梵夾；右第八手持寶塔，左第八手持須彌山，於蓮華臺上半跏而坐。於其座下畫餉棄尼天女，有八臂，跪坐合掌，作供養佛相。金剛手菩薩座下，作吉祥天女，跪坐持寶器，滿盛種種寶供養如來。於吉祥天女後，畫金剛使者天女，作笑面，有四臂，種種瓔珞而為嚴飾，手持種種器仗。餉棄尼天女後，畫花齒天女，身著素服，以手

持花，瞻仰如來。於如來前，畫作七寶花。其花百葉，以金為臺，吠琉璃為莖。其蓮華上，畫作百輻輪，臍輞具足。輪外周匝皆有光焰。於蓮華根下，畫四大天王，悉被甲冑，種種嚴飾，手執器仗。蓮華下畫作水池，以七寶莊嚴。於池岸上應畫持誦人跪坐，手持香爐并持花枝，又持念珠，跪坐瞻仰如來。於寶樓閣上，於虛空中畫梵天、毘紐天、大自在天，散花供養。應依如是儀則畫像。

「其持誦者，著新淨衣，食三白食，從白月八日在如來前如法念誦，至十五日令滿十萬遍。其像動搖，及見自身熾然光明，獲得無障礙眼，證清淨摩尼，行三摩地，於一切持明仙中為轉輪王，親見一切如來。纔誦一遍，遠離一切地獄傍生，能斷貪瞋癡等，離諸慳悋垢，成就一切功德，獲得一切安樂，攝受一切善根。一切如來之所加持，一切菩薩之所安慰，一切諸天悉皆擁護，一切藥叉、羅刹、畢隸多、比舍遮、阿蘇羅、彥達嘑、槃嚕拏、緊那囉、摩護囉識、人非人等，悉來侍衛。於一切王宮，皆得供養，令諸世間皆得順伏。一切功德波羅蜜，悉皆圓滿。如是等殊勝功德，悉皆獲得。若纔誦者，猶獲如上福利，況多增勝！受持者若有讀誦、受持、相應、供養、求成就，并與印契真言相應對於像前，其人等同諸佛，應受天、人、世間供養、禮拜。其人等同諸佛，應見、應知如來之所受記。其人決定不退轉於無上菩提，不復生於母胎。所生世界，蓮華化生，不離諸佛菩薩所生之處，共諸如來集會乃至坐菩提場。」

護摩品第九

爾時，如來復為諸大眾說護摩法：「先須清淨身心，然後作法。一一法速令成就，起廣大利益，為諸有情發如是心，應作護摩如法供養。

「護摩真言曰：

「『唵 娑嚩(二合)訶鉢底 部囉(二合) 部囉(入) 吽 吽 [口*半]吒(半音) 娑嚩(二合)訶(引)』」

「以此真言加持油麻、白芥子，和酥一遍一燒，滿一百八遍，能令一切真言法速得成就，除遣一切障者毘那夜迦。一切罪、一切煩惱、一切冤家、惡友，皆得摧伏禁止，令其迷惑，一切惡夢、災怪、不祥之事，自然消散。

「又以安悉香、白芥子和酥，誦真言一遍一投火中燒之，滿一千八遍，一切鬼魅頭自破裂；一切病患諸瘡，速得除愈；一切鬼神變怪，皆得遠離。又以酥和白芥子，一誦真言一投火中，滿一千八

遍，獲得一邑主。又以白芥子和酥，護摩一千八遍，一切諸魔恐怖、冤家、他敵，悉皆除滅。

「又以天木(杉木是也)和酥，護摩一千八遍，得囉惹并內宮眷屬歡喜敬愛，所求皆遂。

「若以白膠香和酥及白芥子，於山峯上護摩如前遍數，一切諸宮窟門自然而開，即得入中為持明仙中王。

「又以香膠和芥子油，於龍池邊護摩一千八遍，一切諸龍皆得敬愛，所勅皆作之。依時降雨不損苗稼。

「又以飲食護摩一千八遍，供養如來，即得五穀豐饒。

「又以鹽護摩一千八遍，一切藥叉女皆來禮足，作是言：『大家！勿傷我命。』任意驅使，皆得成辦。

「又以酥和粳米，護摩一千八遍，獲大吉祥。

「又以胡椒對日，護摩一千八遍，常得諸天擁護，獲大吉祥。

「又於大吉祥天女前，以油麻和白芥子護摩，得大財豐饒。

「又以遏迦木護摩一千八遍，即成警覺諸佛菩薩，悉知是人離一切罪，於一切世間、出世間真言王，悉皆現前。除一切病，於諸冤敵而得最勝，一切生死苦不能[(麤-夫+欠)-來+(素-糸)]逼。由此真言力故，諸有善業皆易成就，一切惡夢不祥之事皆得消散。一切厭禱、一切繫縛、一切煩惱不能侵擾。如是等護摩事業，能作息災、能獲安樂、獲得財利。設有墮諸惡見眾生，令得正見。」

爾時，婆伽梵告金剛手菩薩：「此教王有大威德，是一切如來心、是諸如來母、是諸如來轉大法輪、是諸如來往詣菩提場、是諸如來建大法幢、是諸如來吹大法蠶、是諸如來坐金剛座、是諸如來降伏魔軍、是諸如來最勝祕密、是諸如來極大祕密。金剛手！此陀羅尼，於瞻部洲，息一切有情煩惱，能除一切有情罪，能竭瞻部洲有情地獄、餓鬼、傍生之業，能除有情生、老、病、死、愁歎、苦憂及諸熱惱。」

爾時，世尊復告金剛手菩薩：「我以天眼觀諸如來，不能說此陀羅尼所生功德聚。此陀羅尼有如上最勝殊妙，如是廣大如是甚深，如是等勝最勝，上最上大神通。如是大寶廣博樓閣教王，薄福少德眾生，必不聞此陀羅尼名字，況復得見，受持讀誦？若有聞見此陀羅尼名者，是人已曾親近恒沙諸佛菩薩。金剛手！此陀羅尼，是如來心，難解難入。若有善男子、善女人，於百千萬劫，供養八十俱知那庾多百千恒河沙諸佛菩薩飲食、衣服、房舍、臥具、百種湯藥、幡蓋、香花、塗香、末香，復以七寶滿三千大千世界，日日中奉施諸佛。金剛手！於汝意云何，是善男子、善女人功德多不？」金剛手菩薩白佛言：「世尊！此人功德無量無邊，不可稱數。」「若有誦此陀羅尼一遍者，此人功德勝前功德，諸佛如來說不能盡。若有

善男子、善女人，於一時頃作意，思惟此陀羅尼，稱量比前供養如一切如來飲食、衣服、香花、七寶功德，倍勝於前，即成供養一切如來。」

爾時，如來說是語已，眾中天、龍、藥叉、彥達嘑、阿蘇囉、孽嚕拏、緊娜囉、摩護囉誡、人非人等，一切大眾踊躍歡喜，發聲稱讚，五體投地，虔誠禮敬，合掌向佛白言：「世尊！此陀羅尼等同如來出於世間。今佛世尊於瞻部洲，能善建立此祕密陀羅尼心法。」

爾時，十方同會諸佛菩薩，咸讚釋迦如來言：「善哉！善哉！」既讚歎已，各還本土。爾時，釋迦牟尼世尊以佛神力還娑訶世界。大寶廣博樓閣善住祕密陀羅尼經卷中

大寶廣博樓閣善住祕密陀羅尼經卷下

開府儀同三司特進試鴻臚卿肅國公食邑三千戶賜紫贈司空^諡大鑒正

號大廣智大興善寺三藏沙門不空奉 詔譯

護摩品第九之餘

爾時，金剛手祕密主菩薩，面貌熙怡微笑身毛聳豎，持金剛杵輪擲揮空，以種種香花、衣服嚴具。諸持明仙眾歌讚歎詠，往詣佛所，以諸香花衣服嚴具而散佛上，遶佛三匝頂禮佛足，漸進佛前，偏袒右肩，右膝著地，合掌白佛言：「世尊！如來今於世間然大法炬，於瞻部洲建立陀羅尼教王。若有見聞此陀羅尼者，等同見佛出興於世，應如是知世尊說是大寶廣博樓閣善住祕密大印曼荼羅教明王法。世尊！若有纔聞此陀羅尼者，於無上菩提決定得不退，疾證無上等覺菩提，解脫一切罪障。唯願世尊為諸眾生說此陀羅尼印法。」即以伽他而問於佛：

「此之祕密印，云何而輪結？

云何安於指？云何復安臂？

云何手按手？云何以印觸？

而作於加持？云何印在心？

云何而舒臂？云何三昧耶？

云何安慰印？云何以神力？

加持速成就？云何金剛座？

云何灌頂印？云何法輪印？

云何持無上？無能勝密印？

云何轉輪印？及如意寶印？

云何四王印？云何吉祥天？

祕密之契印？云何餉棄尼？

及女使者印？云何持壇中？

一切聖眾印？云何迎請印？

云何根本印？心及隨心印？

如上之印法，唯願大牟尼，

而為我解說。由結此印故，

一切業成就。纔見此印故，

諸罪皆清淨。若修真言法，

成無上悉地。願佛說真實，

由結此印故，世尊為我說。」

爾時，釋迦牟尼如來於大眾中，舒金色如象王鼻百千福莊嚴臂，按金剛手祕密主菩薩頂，而安慰之作是言：「金剛手！此大寶廣博樓閣善住祕密陀羅尼印品，如是印法汝今聽、善聽、極善聽，作意思惟。今委寄汝，汝應極生恭敬印品及曼荼羅成就法，當於後世敬重印品，知一切印等同如來，如薄伽梵詣菩提場，如轉法輪，如佛舍利。於後世時，不應授與下族類人、惡性有情、破戒有情、懈怠有情、不淨信者、耽嗜有情、我慢有情，如斯之類不須為說。此陀羅尼等同如來舍利，勿令隱沒。若有薄福有情，聞我此法，便生毀謗。當知此等如毀謗佛，無有異也。是故，金剛手！善應執持此陀羅尼，所在之處如佛無異。」爾時，金剛手菩薩頂禮佛足，白言：「世尊！如是，如是！世尊所說，我當專心受持，恭敬供養，以報佛恩。唯願世尊為我演說，我當守護如來三昧耶，不敢違越，不敢棄捨，不敢疑惑，令持明者速得成就。」

爾時，薄伽梵作念正知，於大眾中以吉祥儀軌，說修行此大寶廣博樓閣善住祕密陀羅尼大印品：「持明者善須依法澡浴，及飲五淨，依法加持及自護身，著新淨衣。先以白檀香遍塗手臂，然後復用鬱金香塗繫於神線。臂釧茅環安於右臂。離喧鬧密靜處，建立精室，或舍利塔前對佛像，面向東方，作吉祥座及結跏坐。先於一切有情起大慈心，深生悲愍，即應誦根本陀羅尼，次誦心陀羅尼、隨心陀羅尼。以花鬘燒香供養一切如來，并供養持金剛、觀自在、曼殊室利、慈氏等憐愍有情者。遍禮十方一切如來。所奉獻者二手合掌。

「應作如是言：『住在於十方，
諸佛攝受我。遍在於十方，
過去及現在，未來諸世尊，
菩薩威德者，我今悉皆禮。』

「『唵 牟尼 摩尼鉢囉(二合)嚩囉 鉢囉(二合)嚩隸麁吽耶(二合)鉢納銘(二合) 摩訶鉢囉(二合)陞 娑嚩(二合引)訶(引)』

「次結普遍光明寶清淨如來心印。先以右手拇指捻頭指甲上如環，餘三指展之。次以左手展其頭指，屈大拇指，押三指甲上。二手相對，置於心前。

「應住寂靜心，觀想佛形像，
身儀應寂靜。復以寂靜眼，
身不應動搖，不動於靜慮，
結印誦密言，數限二十一。

「『唵 薩嚩怛他𑖀多訖哩(二合)捺耶摩拏入嚩(二合)攞寧阿(去)尾瑟吒(二合)也 吽(引)』」

「纔結此印，即持一切如來心印，積集廣大福聚，如恒河沙那庾多百千如微塵諸佛。若有善男子、善女人，苾芻、苾芻尼、優婆塞、優婆夷，以滿三千大千世界七寶，及天妙衣服、塗香、末香、燒香、花鬘、瓔珞、諸莊嚴具、幢、幡、寶蓋，供養一一佛滿百劫。如是供養一切佛已，若有人結此印誦真言一遍，所生善根百分不及其一。如上恒河沙諸佛，不能盡說其福聚。如是大威德有大神驗。纔結此印誦真言，觀念地獄一切眾生，彼地獄眾生皆得解脫，由此觀行皆得生極樂世界。如是等阿修羅及焰魔界、傍生，皆得解脫一切身垢，過現生身得清淨，一切如來攝受護念，即成見一切如來，皆由結此普遍光明寶清淨如來印威力故。

「次結一切如來心印，亦名安慰一切如來印。先以左肘當胯，平展仰掌，即屈無名指、小指，以大母指押之。右手准前印不改，顰眉羯吒訖叉眼，自視其身。微屈身，齒咬下脣，應誦真言曰：

「『唵 薩嚩怛他𑖀多 鉢囉(二合)嚩囉𑖀囉囉摩拏 吽』」

「纔結此印誦真言，即成入一切如來所有三昧耶曼荼羅，則成俱知三昧耶者。若人百千劫來宿障，由見此印，即得消滅，閉一切惡趣門。即成結一萬四千俱胝那庾多百千佛大三昧印及誦真言，又同結一切如來部族印。一切夜叉、羅刹、部多、諸毘那夜迦等，皆悉被燒，如一火聚。是諸障者，面皆踣地，皆順三昧耶，不敢違越。一切諸天頂戴誦持者二足，皆住三昧耶。由纔見聞此印故，即成知一切三昧耶者。一切惡龍亦順，住三昧耶，不敢違越。無有三昧耶、祕密曼荼羅教軌儀，無不知者，悉皆成入。由結印誦真言故，諸有惡人不敬信者，及外道、冤敵、不饒益有情者，皆起慈心，深生恭敬。一切懷惡意諸煩惱者，悉皆消滅，即成具三昧耶，即離一切罪障，即成歸依三寶，即成就大福德聚，遠離諸疾病，離一切慳慳煩惱垢。

「次結一切如來普遍大寶三昧耶祕密大印。先以右手置右膝上，以大拇指捻中指甲上，次以左手仰橫安心上，以母指押中指、無名指甲上，舒頭指及小指，發慈心開目而住，即誦真言曰：

「『唵 薩嚩怛他𑖀多毘 三冒馱娜 嚩日[口*(忝-禾+利)](二合)吽』」

「纔結此印誦真言，即得一切如來之所安慰，皆稱：『善哉！』舒手按頂，憐如愛子，則為一切如來之子，千俱胝那庾多恒河沙諸佛所共安慰。其人一切罪障皆得清淨，一切煩惱悉皆消滅，一切菩薩悉皆禮敬，一切諸天悉皆侍衛，一切鬼神并一切夜叉羅刹，悉皆不敢侵凌。一切障礙毘那夜迦不敢惱害，馳散十方。一切皆起慈心，

由見此印故，無有疑也。見持明者，持此最勝印，當知佛菩薩現前安慰。由誦此真言，當知是佛音聲，等同諸佛。佛語甚深難聞。若有善男子、善女人，苾芻、苾芻尼、塢波索迦、塢波斯迦，若持明者，結跏趺坐，結印誦真言。若得見持此真言人，則成見六十二恒河沙百千俱知那庾多諸佛如來、應、正等覺，不應起疑惑，應當供養彼人，奉其衣服。應起恭敬，如大師想，觀持明者等同諸佛，當知是人則同諸佛。一切希求勝願皆得滿足。若一時間結印誦真言，慈心遍緣六趣輪迴諸有情，二足、四足、多足，思惟起慈愍心，輪迴有情及傍生者，皆獲安慰，獲佛菩提不久，諸天擁護。於一切曼荼羅，成知三昧耶者，即成誦一切真言，即成結一切印。

「次結一切如來莊嚴大寶光加持祕密大印。以二手右押左，背相叉，屈二頭指各如鉤，二小指各直豎，二大指各屈在掌中。結跏趺坐，以印當臍上，傾身向右，顰眉眼，寂靜而視。觀想諸佛住大慈心，應誦真言，矜愍一切有情。觀佛色相，置印於頂上。結印時，誦『唵』字、『吽』字、『泮』字。結印已，由誦『唵』字成加持菩提場，由誦『吽』字加持轉法輪，由誦『泮』字加持菩提樹，如須彌山不傾動。一切如來所加持，一切佛皆與授記，一切處加持人天。是人身得清淨，如日光摩尼照曜，離一切罪，增長福德聚。是處猶如翠堵波，由結此印故。由如菩提場，諸佛所加持，加持於十地，亦加持不退轉處。能淨宿障，解脫諸惡趣，關閉諸地獄門，開諸天門。是人於七十二恒河沙數俱低那庾多百千諸佛所種植善根，獲得授記。一切鬼、神、夜叉、羅刹及龍，皆生恐怖。及諸障毘那夜迦踰面於地，如火聚焚燒。及諸餘類難調伏者，摧壞無疑。此印難見難聞，離一切罪，及離八大地獄，成就一切真言教法，即成入一切曼荼羅一切三昧耶印，如來所說皆得加持，亦能加持一切印，成佛菩提最勝。纔結此印，一切處常得加持。真言曰：

「『唵 薩嚩怛他藥多 地瑟姪(二合)那 摩尼 摩尼吽 泮吒(半音)』」

「次結如來寶大金剛安立金剛師子座印。

「先應結金剛加座。即結金剛合掌印，想身為金剛杵形，微屈身，觀想遍毛端遍觸，然後二手合掌，屈二頭指捻二大指甲，豎二中指如金剛杵形，直豎二無名指，以二小指挾在無名指背。以印觸地，及觸二膝，即安於臍。此名二金剛師子座印。其地猶若金剛，周匝十方如金剛牆，亦成一切如來座，由一切如來加持故，成金剛座樓閣，一切難調伏者不能沮壞。一切處得無畏，及障者毘那夜迦，一切諸魔類，由結此印皆得超勝，彼皆一切馳散。及夜叉、羅刹、大力作障者，悉皆遠離。難伏不見形者，及諸不友、冤敵、惡心眾生，悉皆殄滅。由結此印故，一切有情，若男若女，皆得敬愛，王

及後宮皆得歡喜。及餘有情在於地上，皆得敬伏，一切隨順，晝夜無間斷。由諸佛加持成金剛寶殿，建立師子座。由佛神通加持故，如俱胝恒河沙數百千應供正遍知處，成金剛師子座。由纔結此印，於如是等如來所，成奉獻金剛座，則獲一切如來神力加持。由纔結如來寶大金剛建立金剛師子座印，一切地獄、傍生、焰魔界、餓鬼、阿蘇囉身、一切地獄等，由先世業障以此金剛牆令摧壞、令繫縛，皆令消滅，其身得清淨，成金剛不壞身。由誦真言結印故，於諸惡趣皆得解脫，及解脫一切罪。真言曰：

「『唵 薩嚩怛他惝多鉢囉(二合)嚩囉 摩尼嚩旨黎 吽 吽 泮吒(半音)』」

「次結一切如來大寶出生灌頂大印。

「二手合掌如金剛杵，二頭指傍舒，二中指屈節，指面相合，直豎二無名指如金剛杵，二大指押二小指甲上。結吉祥跏座，置印於頂上。應誦此真言曰：

「『唵 薩嚩怛他惝多 尾麼羅三婆吠 吽 吽』」

「纔結此印誦真言，其持明者於六十八百千恒河沙數微塵等如來應供正遍知，以一切如來神變加持獲得灌頂。即彼乃至得如上如來繫無垢繒於其首，以一切曼荼羅印品明真言灌頂，成就無量阿僧祇福德聚，獲得無量善根。一切菩薩，金剛手，於持明仙人，以百千遍灌其頂。一切天、龍、夜叉、乾闥婆、阿蘇囉、孽嚩拏、緊那囉、摩護囉識、四天王，與成彼持明人灌頂。一切持明仙中輪王，與成彼灌頂，為一切如來長子殊勝灌頂，成一切如來三昧耶祕密曼荼羅灌頂，以大寶廣博樓閣祕密成灌頂。一切不友、冤敵、作障者毘那夜迦、惡藥叉、羅刹、部多、鬼、神，不能見彼持明者。其持誦者身如虛空，隱形不現，普遍十方一切佛刹一切如來、應供、正遍知。廣大衣服繒綵，七寶瓔珞莊嚴頭冠，於一切如來所，作大供養雲海，成供養灌頂。由纔結此印，得如是神通自在善根，成就如是大威德、大福利。

「次結一切如來光明大寶摧魔熾然法輪神通加持大印。

「二手合掌安於心，以右手大指、頭指甲相捻，餘三指直舒，掩於心。屈左手大指入掌中，捻中指甲上，餘三指微屈。二手背相著，其左手掌面向前，結跏趺坐，應誦真言。住慈三摩地，內心定寂靜。由結此印，即轉清淨大法輪，三千大千世界六種震動無疑，諸佛菩薩皆觀察持明者。金剛手歡喜，并諸天眷屬、持明轉輪王，常來侍衛持明者，四大天王晝夜常護持四方，一切如來常加持。由轉法輪，於諸眾皆得超勝一切障、作障毘那夜迦。持明者若持此印，心得寂靜，離諸障難，是人等同如來出興於世轉大法輪，如坐菩提場轉大法輪。我見彼人等同諸佛，應當供養，所獲善福如供養佛。

持誦者應清淨心，於諸有情常起悲愍。應結印誦真言，少顰眉脣齒俱合，觀想佛形如轉法輪。心作是思惟：降伏諸魔，制諸障難。由結此印誦真言故，能然大法炬、建大法幢、擊大法鼓、吹大法蠡、作大師子吼，增長福德聚。由纔結此印，如結八十俱知恒河沙諸佛真言密印。是諸如來亦加其威神，咸稱：『善哉！善哉！』授菩提記真言曰：

「『唵 薩嚩怛他孽多三摩耶 摩拏嚩日黎(二合)吽 吽』

「次結無能勝印。以右手大指拄頭指頭，屈如環，餘三指直豎。左手亦然。豎二手，所舒指背相著以印。小指當於臍，顰眉向下觀身，以右脚押左脚。以羯吒訖叉眼顧視意。誦真言即舉右脚，以大母指觸地。由纔結印誦真言故，即能降伏諸魔并諸營從得勝，及降伏一切作障毘那夜迦，及不現形者，一切夜叉、羅刹。於諸冤敵通達無礙，及諸不友、冤敵得勝，離諸煩惱苦及諸鬼趣得勝。於其身中，貪、瞋、癡，及餘種種煩惱，彼皆寂靜。由纔結印故，則解脫諸罪，一切所往處得勝。於真言法得無障礙，得成無障礙事，得離一切諸病，乃至證菩提。一切處諸天擁護於十方。無能勝真言曰：

「『唵 薩嚩怛他孽多惹耶尾惹耶阿爾多 嚩日嚩(二合) 吽 吽』

「次結一切如來轉法輪印。

「先以右手握大母指作拳，左手亦然。以右拳安於左拳上。由結此印，一切如來之所印可，如恒河沙俱胝百千如來咸皆歡喜，受與無上悉地。是諸如來決定現其身。於一切持明仙眾中為轉輪王，一切真言、印契、教法悉皆通達如在心。於諸曼荼羅成就，最勝一切諸天十方擁護。轉法輪真言曰：

「『唵 薩嚩怛他孽多 達磨馱都 摩訶麼拏試佉黎 喝囉 喝囉 吽 吽 泮吒(半音)』

「次結金剛手菩薩印。

「先以二手合掌，二中指右押左，內相叉。二頭指并二大指如金剛形。豎二無名指，指面相著。二大指直豎，二小指撥開。舉其左肘，下其右肘，顧視左肘。右脚押左脚，半跏微展左脚。作顰眉怒目瞋相，以齒齧下脣，喉中稱『吽』聲，意誦真言。觀己身如金剛手。纔結印誦真言故，三十三天皆大驚怖，一切天宮悉皆震動，一切夜叉、羅刹王，及難調諸龍、鬼神、毘那夜迦及諸作障者，悉踣面在地號哭，四方馳走。金剛手皆大歡喜，受與悉地。真言教法悉皆成就，福聚增長，持明中為主宰。若能三摩地相應，洗浴清淨，塗香塗身，著新淨衣服，諸佛如來觀察其人，一切曼荼羅聖眾皆大歡喜。真言曰：

「『唵 薩嚩怛他孽多 摩訶嚩日囉(二合)賀嚩耶駄囉 駄囉
吽 吽 泮吒(半音)』

「次結寶金剛菩薩印。

「准前印，唯揲開二頭指，安印當心，結跏趺坐。起慈心眼，寂靜而視，端嚴柔軟誦真言。隨其意思所求滿足。金剛手常歡喜，觀彼人如所愛子。真言曰：

「『唵 杜嚩(二合) 杜嚩(二合) 摩尼 摩尼 摩訶密爾與(二合)怛
末尼(二合) 娑嚩(二合引)訶(引)』

「次結四大天王印。

「先以右手安於臍上，屈大指入掌，以頭指捻大指頭，餘三指直舒。左手安左胯上，直舒頭指，餘三指握大指為拳作擬勢。身向前微屈，眼視右手，作忿怒形，怒目不轉睛。應誦真言曰：

「『唵 嚩迦播里低 惹耶 惹耶 吽』

「次結吉祥天女印。

「先以二手虛心合掌，二頭指、二中指、二無名指散開，微屈，如開敷蓮花形。由結印誦真言，能滿一切所希求願。是大威德者真言曰：

「『唵 尾摩羅孽羅(二合)縛底 三婆囉 吽』

「次結餉棄尼天女印。

「以右手近右乳邊，頭指直豎，大指屈入掌中，以中指、無名、小指慢為拳。左手覆左膝，觸膝上。曲身向前，怒目而視。應誦真言曰：

「『唵 能(上)瑟置哩(三合)拏(平)尾娑羅 吽』

「次結使者天女印。

「先以右手仰掌，當心平展，下其肘。次以左手平展覆掌於右手下。二手背相背，舉其臂肘，引頭向前微曲身。誦真言曰：

「『唵 阿譏麼野地囉門(上)者吒訶悉爾 吽』

「次結曼荼羅中一切聖眾印。

「以二手指相叉鉤結，安於臍。展左脚按地即成。誦真言曰：

「『唵 三曼多迦囉 跋哩布囉拏 駄迦 駄迦 吽泮』

「次結花齒天女印。

「先以右手屈五指如蓮華形，安左耳上。左手准前安於心。真言曰：

「『唵 娑囉 娑囉 尾娑囉 吽 吽』」

爾時金剛手，復白世尊言：

「云何根本印？云何是心印？

云何隨心印？牟尼為我說。」

世尊作是言：「二手作合掌，

應置於心上。 屈於二頭指，
及以二大指， 相捻猶如環。
二中指蹙屈， 猶如於寶形。
豎合二無名， 揲開二小指。
是名根本印。 智者結此印，
誦根本密言， 即成先行法。
次說心印相。 先以於右手，
仰掌安於心。 大指與無名，
而以頭相捻， 餘三指平舒。
次以於左手， 大指捻小甲，
餘三亦直舒， 覆於左膝上。
是則名心印， 亦名安慰印，
功能如根本。 次法隨心印。
准前心印相， 大母與頭指，
相捻猶如環， 依前左膝上。

「結此印能成辦一切事業，滅一切罪、除一切煩惱，不久決定當得佛菩提。若人結一一印，其福不可量。由結此印，於無量阿僧祇恒河沙數俱胝那庾多百千如來、應、正等覺，兩大供養雲海，塗香、末香、華鬘、衣服、幢幡、瓔珞，嚴具七寶，於一切如來成供養。種種百味飲食，隨如來所宜成出生供養。隨其意樂，醫藥資緣，於一一如來前，成廣大供養。由結印誦真言，於一切如來平等，於十方即警覺。彼等如來稱：『善哉！』悉皆授與記。一切如來安慰其人，樂見彼人。金剛手、持明王并諸眷屬眾，晝夜常擁護其人。四大天王決定擁護其處，等同翠觀波。由結此印故，其地如來說如有舍利塔，皆得決定不退轉。是故，金剛手！若善男子、善女人，苾芻、苾芻尼、優婆塞、優婆夷，淨信持明者，應當極生恭敬，受持、讀誦、供養。若自書寫、勸他書寫，應當結印。以大信心，以大恭敬，以種種物，應當供養。其善男子、善女人，苾芻、苾芻尼、鄔波索迦、鄔波斯迦，獲大福成就。一切戒成就，大精進、大忍辱成就，大禪定成就，檀那成就，大智慧成就，廣大功德成就，六波羅蜜圓滿。若有得此陀羅尼印壇場法者，成就如是廣大功德。」

佛說是經已，金剛手菩薩摩訶薩，及一切大眾，天、龍、藥叉、彥達嚩、阿蘇囉、藥嚩拏、緊娜囉、摩護囉識、人非人等，皆大歡喜，信受奉行。

大寶廣博樓閣善住祕密陀羅尼經卷下◎

CBETA 贊助資訊

[. \(https://www.cbeta.org/donation/index.php\)](https://www.cbeta.org/donation/index.php)

自 2001 年 2 月 1 日起，CBETA 帳務由「財團法人西蓮教育基金會」承辦，並成立「財團法人西蓮教育基金會」－ CBETA 專戶，所有捐款至 CBETA 專戶皆為專款專用，歡迎各界捐款贊助。

您的捐款本協會皆會開立收據，此收據可在年度中申報個人或企業的綜合所得稅減免。感恩諸位大德的善心善行，以及您為佛典電子化所做的一切貢獻。

信用卡線上捐款

本線上捐款與聯合信用卡中心合作，資料傳送採用 SSL (Secure Socket Layer) 傳輸加密，讓您能夠安全安心地進行線上捐款動作。

[前往捐款](#)

信用卡（單次 / 定期定額）捐款

本授權書可提供單次捐款或定期定額捐款之用途。

請於下載並填妥捐款授權書後，請傳真至 02-2383-0649，並請來電 02-2383-2182 確認。

或掛號寄至 10044 台灣台北市中正區延平南路 77 號 8 樓 R812 財團法人西蓮教育基金會收。

請在此下載 [授權書](#) (MS Word 格式)

劃撥捐款

郵政劃撥帳號：1 9 5 3 8 8 1 1

戶名：財團法人西蓮教育基金會

欲指定特殊用途者，請特別註明，我們會專款專用。

線上信用卡 / PayPal 捐款

PayPal 是一個跨國線上付款機制的公司，CBETA 引用其服務，提供網友能在線上使用信用卡或 PayPal 帳戶贊助 CBETA 。

PayPal is an online system of a global payment solution. CBETA uses its service to provide the uses to donate by using the credit cards or PayPal account to support the CBETA project.

相關收據開立事宜，由於付款幣別為美元，我們除了會依您所贊助之美元金額開立收據外，另我們會依捐款當日公告匯率開立台幣收據，此收據為國內正式合法報稅憑證。

Since the donation made is in US currency, hence all the receipts will be issued in the US dollars consequently. However for the domestic donators, a Chinese official receipt will also be made according to the foreign exchange rate for the purpose of tax deduction.

[線上信用卡 / PayPal 贊助](#)

支票捐款

支票抬頭請填寫「財團法人西蓮教育基金會」。

CBETA is part of Seeland Educational projects, any donation (ex- cheques, remittance, etc.,) please entitle to "The Seeland Education Foundation".
